

## Mepepelime ma Bulu a tyo ya Titu

### *Ucuduwu wa aatagada a nda*

Titu kamba ta Bulu aajiya atsuma o ulinga wa yi. Bulu dana ta mepepelime ma nda a tyo ya Titu adama a na u shi ta u buwa atsuma a lyuci gbain va Karita, ayi gba Bulu lyuwa ta elime na mmalu.

Bulu yuwan ta adanshi cine wu ntsayi aza e Itoni e Yesu a yuwan wuma u le. Waru u yuwaan ta mologo suru adanshi aza a na a ri pe atsuma a aa'isa aza e Itoni.

Na vu ri zagbain atsuma a aa'isa aza e Itoni, ko aabara, ko makuci ma da vu ri, ko ulobo u da vu ri ko ka, vu ta tsura uritosu u sa'ani adama a wu atsuma a aatagada a nda.

### *Ili i na iri pe atsuma a aatagada a nda*

1. Icasu na avasa a tyo ya Titu (1:1-4)
2. Wila adama a azagbain a aa'isa aza e Itoni (1:5-16)
3. Wila adama a ama a aa'isa (2:1-3:11)
4. Asala ni icasu yu ukosu (3:12-15)

### *Ucuduwu*

<sup>1</sup> Amu da Bulu aagbashi a Asula, waru amu aajiya e Yesu Kristi Zamawawa da. Asula a lyungu mu ta tsara n tawa nu ucawu wo okolo e ekere a aza a na u dangwai. Waru u lyungu mu ta tsara n rito le e reve amayun a na oo rocosu le ununa aa yuwan nden n sa'ani nu ununa Asula aa yuwan mazanga ne ele. <sup>2</sup> Amayun a nda a ta ca le uzuwu

wo okolo a wuma u babu ukotu, za na *Asulā* a yuwaan nle nzuwulai kafu u yuwan uvadi, waru waa yuwan epen shi. <sup>3</sup> Gogo mantsa ma na ma ntsayi ma *da*, u rocoi Alabari a Sa'ani'i, waru tsu damma *tā* za suru. Nu udammu *wā* *Asulā* Za vi Iwawi i tsu i *da* a zuwa numu n yuwaan yi ulinga u *nda*.

<sup>4</sup> N ta *danasaa* wu mepepelime ma *nda*, Titu, mawun ma amayun *mā* *vā* *atsuma* o ucawu wo okolo a na tsu ri na *ayi*. Lyawa *Asulā* Dada na Yesu Zamawawa tsu ca wu isa'ani na asuvu nden.

### *Ulinga wā Titu atsuma a Karita*

<sup>5</sup> N lyawa wu *tā* *atsuma* e *ida* ya Karita,† *tsara* vu koso ulinga u tsu u na u ri *de*, waru *tsara* vu *dangula* azagbain† *atsuma* a *a'isa* a *aza* e Itoni *atsuma* e ilyuci suru ununa n damma nuwu.

<sup>6</sup> Zagbain suru u ciga u 'yuwan wo o'wo vuma na ama a yuwan majiyan ma sa'ani a aci *a* yi adama a na u yuwain nden n sa'ani. U ciga u 'yuwan u *dana* vali vu ka *tā*. Waru muwun *mā* yi moo o'wo *aza* e Itoni *a* *abula*, aza a na aa yuwusan nden mu uwuyanu shi, waru aza a na *a* ri na aciyogbamu shi. <sup>7</sup> Ne *da* waru zagbain u ciga u 'yuwan u yuwan wuma u sa'ani adama o ulinga *wā* *Asulā* u na waa yuwusan. U *dana* za vu ugbawu wan, waru u *dana* za vu upan babu *usan* wan. U ciga u 'yuwan u *dana* ososowi wan.\* She u *dana* za vu ulungusu wan. She wo o'wo za vi icigi yi ikebe lon wan. <sup>8</sup> U

---

\* **1:7** A mantsa *mā* ndede aza a Isra'ila o tsu sowo *tā* *mara* gashi *aguma* a *da*, na *a* ri ubanakun. Waru, o tsu sowo *tā* wa'a na aa lyuwusa ilyalya. Amma a mantsa *mā* tsu tsa'a gura sowo wa'a *avu* tsu lyawa shi, adama o ndolo u ta la'a ulobonu tsu rito sowo *mara* wan, ko ke'en.

ciga u 'yuwan u kalyuwa omocin a na aa tawusa o u'wa wa yi ulobonu, u ciga ili i na i ri ulobonu suru. U ciga u 'yuwan u dana nu ugbozu, waru u dana za va abula. Wuma wa yi u dana cece a na woo yo'onoto Asula okolo, waru u gura guza aciyayi ulobonu. <sup>9</sup>U ciga u 'yuwan u guza uritosu wa adanshi a amayun. Reve u yuwan ulinga nu uritosu'u u kamba ama, waru u lapula aza a na a yuwusan mawasan na adanshi a Asula.

<sup>10</sup> Ne da wa da dana adama a na ama o ro o ta lo aza a na a yuwusan mawasan nu uritosu wa amayun. Ama a nda a tsu yuwusan ta adanshi a vama, reve waru a lulumusa ama. Atsuma a munlu n ndolo ozo o ro na abunda a ta pe atsuma a aza a na a dammai she na a pada vuma suru uryumbu. Ama a nda ele da a la'ai adanshi a vanvama. <sup>11</sup>I ciga i 'yuwan i bara ama o ndolo na cu'un va adanshi o ndolo. A vadala ta de 'wa diga o uritosu wa amayun na cu'un vu uritosu u vama u ndolo. A yuwan ta ili i ndolo suru tsara a tsura ikebe o ure u vama. <sup>12</sup>Hali vuma ta atsuma a aza a Karita za na ri za yindi yuwan ta adanshi adama e icu'un ya ama o ndolo, u damma, "Ama a Karita suru aza e epen a da, na nlyayi, orogo, na aliwi." <sup>13</sup>Amayun a da. I bara le nu ucira tsara a zuwa le a yuwan ucira atsuma e Itoni. <sup>14</sup>Waru a 'yuwan a ciga a lyawa mazuwa ma atsuvu a alabari a aza a Isra'ila, waru she a zuwa atsuvu e le a adanshi a ama a na a lyawai amayun wan.

<sup>15</sup> Ili suru e ekere a aza a na okolo e le a ri cece a ta cece. Agba e ekere a aza a na a ri no okolo e iwuya, ili suru ili yi idaba i da ni ili i na aa usu shi, adama a na okolo e le na asuvu e le a

buwa ulobonu shi. <sup>16</sup> Icu'un ya ama o ndolo a ta kalyuwusa gashi e reve ta Asula, agba a wasan yi ta ununa aa yuwusan wuma u le. Aza a tsu uwwa adanshi shi da, waru a tsu yuwan ili ya afula shi. Ama suru a suma le ta adama e ili yi idaba i na aa yuwusan.

## 2

### *Ili i na voo rito*

<sup>1</sup> Agba avu, vu damma aza e Itoni a yuwan cu'un wuma na rotsoi uritosu u sa'ani. <sup>2</sup> Vu rito mbara a guza aciyele, adama a tsura tsugbain waru a dana nu ugbozu. A ciga a 'yuwan a dana nu ucawu wo okolo lon, waru a dana ni icigi lon na ankuri.

<sup>3</sup> Ne da waru, vu rito amaci a na a paduwai esu a yuwan nden n sa'ani n na mu ntsayi aza a na oo tonon Zagbain. She a kara a yuwusan idami ya aza e le atsuma a lyuci wan, waru she o o'wo ososowi wan. Na a yuwan ne, oo to rito akapi a amaci ili i na i ri ulobonu. <sup>4</sup> A ciga a 'yuwan o rito amaci a wawa'a a ciga ali e le na muwun n le. <sup>5</sup> O rito le a yuwan nden n sa'ani nu ugbozu. Waru o rito le cine aa kalyuwa 'wa le ulobonu, waru a yuwan ili i sa'ani. O rito le ununa aa yuwan ntonilo i na ali e le ulobonu. Ne da aa yuwan avu a kuda tawaa Adanshi a Asula ni ili i wono.

<sup>6</sup> Ne da waru, vu damma olobo a dana nu ugbozu atsuma e ili i na aa yuwusan suru. <sup>7</sup> Avu na a aciyawu vu ciga vu 'yuwan vo o'wo iroci ye'e le a mayan me isa'ani atsuma e ili suru. Atsuma e ili i na vaa yuwan suru, lyawa vu roco wuma u sa'ani nu usapu wa aci atsuma o uritosu wa wu. <sup>8</sup> Lyawa uritosu wa wu wo o'wo mejege adama a

tsurā za na aa yuwan adanshi o ro a aci a yi wan. Ne da aza a na a cigai a yuwan mawasan a uwwa wono, adama a na aa tsurā ili i wuya i na aa yuwan adanshi a aci a tsu shi.

<sup>9</sup> Na agbashi a ciga a 'yuwan a yuwan ntonilo i na azagbain e le, waru na a ciga a 'yuwan a yuwaan le ili i na yoo yo'onoto le asuvu. She a yuwaan le adanshi nu ugbawu ko a yuwan le wivu wan.

<sup>10</sup> Agba a ciga a 'yuwan o o'wo ama a sa'ani a na oo sofuwo matsan. Ne da oo o'woto uritosu wa Asula Za vi Iwawi i tsu maluwa o ure suru.

<sup>11</sup> U to o'wo ne tsunda, adama a na Asula o roco ta ama suru isa'ani ya yi tsara a tsura iwawi.

<sup>12</sup> Isa'ani ya Asula i roco tsu ta tsu vadala diga a nden m babu Asula avu waru tsu lyawa ure wi ili i na tsaa ciga u yo'onoto tsu okolo. Uvadi u nda u ta ni iwuya, tsu danuyi pe nu uguzu wa aci. Waru na tsu ciga tsu 'yuwan tsu danuyi na ala a sa'ani nu ucawu wa aci e ekere a Asula. <sup>13</sup> Ne da waru, tsu ta kalyuwusa urana u sa'ani u Mogono ma Asula na Za vi Iwawi i tsu, za na ayi da Zagbain Yesu Zamawawa. O urana u ndolo Zamawawa ta tawa na tsugbain tsa yi suru. <sup>14</sup> U kuwa ta adama u wawa tsu diga o unusu suru, waru tsara u kambato tsu cece. Waru u ca ta aciyayi tsara u kambato tsu ama a yi, adama tsu kambata a mayan me isa'ani suru suru.

<sup>15</sup> Ciga 'yuwan vu ritosu ili i nda, reve waru vu damma ama a wu o toni le. Ciga 'yuwan vu barasa le ubata u na a nusain. Vu ta nu ucira u na vaa yuwan ne, adama o ndolo she vu lyawa nanza kambato wu mawun wan, waru she vu lyawa nanza kudata kuru ili i na vu dammai wan.

### 3

#### *Yuwan ili i na i ri ulobonu*

<sup>1</sup> Vu damma ama a wu a yuwan tsutoni na ngono, na azagbain a gwamnati. Ama a wu waru a dana na ntoniloi, reve waru a dana ufofu kuci na aa yuwan ili i na i ri ulobonu. <sup>2</sup> Na a 'yuwan a ciga a yuwan adanshi e iwuya a aci a vuma ro wan, waru a ciga a 'yuwan a lyawa nwasanlai. Na a yuwan ne, a ta dana no okolo nven reve waru a ca ama suru tsugbain tsa amayun.

<sup>3</sup> De nu ufaru, tsu dana ta na tsulo nu ulambu wu ntoniloi. A luluma tsu ta de, avu tso o'wo agbashi e icigi yi iwuya na mawwa mo uyo'o me iwuya. Reve wuma u tsu u dana ni iwuya lon na tsushu'un. Waru tsu 'yuwan ta ama o ro, reve ele fo a 'yuwan tsu.

<sup>4</sup> Agba ayi Asula, za na ayi da Za vi Iwawi i tsu, u roco tsu ta isa'ani ni icigi ya yi. <sup>5</sup> U wawa tsu ta adama a na we enei iliyali i tsu, agba adama e ili i sa'ani i na tsu yuwain da shi. Wu za'wa ta unusu u tsu avu u ca tsu wuma u sa'avu atsuma a Ruhu va Akiza. <sup>6</sup> Asula a tsuwaan tsu ta Ruhu va yi pere adama e ili i na Yesu Zamawawa yuwaan ntsu. <sup>7</sup> U kambato tsu ta aza a babu unusu adama a abajini e isa'ani i na u yuwaan ntsu. Waru atsu gogo tsu reve ta tsu ta tsura wuma u babu ukotu. <sup>8</sup> Ili i na n dammai nda suru amayun a da. N ciga wu ta vu yuwusan ne tsara aza a na a cayi Asula okolo a yuwan ugbozu a yuwan ili i sa'ani mantasa suru. Ili i nda a tu ulobonu waru a ta nu urana o ukere wa koyan.

<sup>9</sup> She i uwa mawasan me pere adama a nkaya wan. She i uwa nlangi na mawasan adama o

tsutoni tsa Wilā wa aza a Isra'ila wan. Icu'un yi ili i nda suru a ri nu urana shi, waru mantsa ma da a tsu lungusa. <sup>10</sup> Na za ro to mpolo u tawaā du na wukasu, i ciga i 'yuwan i bara yi tsuḅari tsu ufaru, nu u dashiyisā a yuwaan yi tsuḅari tse ire. Na wu uwwa shi, she ili i ro i dashi 6olo du na cu'un vuma ndolo wan. <sup>11</sup> Icu'un ya ama o ndolo a lyawa ta amayun. Ama'a a ta yuwusan unusu, reve waru o kototo aciyele adama e ili i na aa yuwusan.

### *Icasu yu ukosu ya Bulu*

<sup>12</sup> N te ifoḅi n lyunguwa du na Aritima ko Tikiku. Na vuma ta atsuma e le u rawa, vu yuwan atyo a na vaa yuwan tsara vu cina mu a Nikafoli. Ili i na i zuwai ayi da n dangwa ta n danu de mantsa mo utanu. <sup>13</sup> Vu yuwan atyo a na vaa yuwan tsara vu kamba Zina, za vu urevu wu uge'etosu wa adanshi, na Apolo atsuma a mmalu n le. Vu kamba le ni ili i na a cigai suru. <sup>14</sup> Aza e Itoni a zami ulinga u sa'ani na a ciga a 'yuwan, waru a kamba ozo o ro aza a na a cigai ikambi. Ili i na i zuwai ayi da adama ama a tsu a yuwan nden me pere a wuma u le wan.

<sup>15</sup> Ama suru pa nda a ta casasa wu. Waru vu yuwan ankuri vu casaa mu aza e Itoni suru aza a na a ciga ntsu.

Lyawa isa'ani ya Asula i dana obolo na adu suru.

**Nzuwulai n Sa'avu na Tsishingini na adiva a  
na a dangulai a Nzuwulai mu Ufaru  
New Testament in Tsishingini (NI:tsw:Tsishingini)**

copyright © 2011 Wycliffe Bible Translators, Inc.

Language: Tsishingini

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Tsishingini

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



2019-08-09

---

PDF generated using Haiola and XeLaTeX on 11 Nov 2022 from source files  
dated 29 Jan 2022

bb185c63-dc44-572c-ae93-66252c4dfa1e